



KENYATAAN MEDIA

KEMENTERIAN EKONOMI
JABATAN PERANGKAAAN MALAYSIA

Blok C6 & C7, Kompleks C,
Pusat Pentadbiran Kerajaan Persekutuan, Presint 1,
62514, Wilayah Persekutuan Putrajaya
No. Telefon : 03 - 8090 4681

PRESTASI PERUSAHAAN MIKRO, KECIL DAN SEDERHANA (PMKS) MALAYSIA 2024

**Keluaran Dalam Negeri Kasar (KDNK) PMKS berkembang 5.8 peratus,
menyumbang 39.5 peratus kepada ekonomi Malaysia pada 2024**

PUTRAJAYA, 31 JULAI 2025 – Jabatan Perangkaan Malaysia (DOSM) menerbitkan statistik Perusahaan Mikro, Kecil dan Sederhana (PMKS) Malaysia bagi tahun 2024. Statistik PMKS ini merangkumi sumbangan PMKS kepada ekonomi dari segi Keluaran Dalam Negeri Kasar (KDNK), Eksport dan Guna tenaga.

PMKS Malaysia terus menunjukkan daya tahan dan kebolehsuaian dalam persekitaran ekonomi global yang mencabar pada tahun 2024, dengan pertumbuhan dipacu terutamanya oleh pemulihan berterusan dalam sektor pelancongan dan aktiviti berorientasikan pengguna. Industri berkaitan pelancongan seperti perdagangan borong & runcit, makanan & minuman, penginapan serta pengangkutan kekal menjadi pemacu utama kepada prestasi PMKS. Lonjakan ketibaan pelancong asing, terutamanya dari China dan India, disokong oleh kadar pertukaran yang menggalakkan telah memperkukuhkan kedudukan Malaysia sebagai destinasi pelancongan pilihan. Kerajaan terus memperkukuh sokongan terhadap PMKS dalam usaha meningkatkan kapasiti dan keupayaan melalui pendigitalan dan inovasi serta mempertingkatkan daya saing PMKS di pasaran global.

KDNK PMKS Malaysia bertumbuh 5.8 peratus pada tahun 2024, menyumbang nilai ditambah sebanyak RM652.4 bilion atau 39.5 peratus daripada KDNK Malaysia. PMKS mencatatkan pertumbuhan sedikit tinggi berbanding pertumbuhan keseluruhan KDNK Malaysia iaitu 5.1 peratus pada tahun 2024. Sebagai perbandingan, KDNK PMKS meningkat 4.9 peratus pada tahun 2023, dengan nilai ditambah berjumlah RM616.6 bilion.

Menurut Ketua Perangkawan Malaysia, Dato' Sri Dr. Mohd Uzir Mahidin, "Perkembangan ini disokong oleh prestasi yang stabil dalam sektor Perkhidmatan dan Pembuatan yang merangkumi 84.7 peratus daripada KDNK PMKS. Ini diikuti oleh sektor Pertanian (8.7%), Pembinaan (5.0%) dan Perlombongan & pengkuarian (0.5%). Dari segi prestasi sektoral, sektor Perkhidmatan meningkat 5.7 peratus pada tahun 2024 berbanding 6.5 peratus pada tahun sebelumnya. Prestasi yang menggalakkan disokong oleh peningkatan dalam Perdagangan borong & runcit, makanan & minuman dan penginapan (4.5%); Kewangan, insurans, hartanah & perkhidmatan perniagaan (8.4%); dan Pengangkutan & penyimpanan dan maklumat & komunikasi (8.6%). Sektor Pembuatan meningkat 5.0 peratus pada tahun 2024 (2023: 1.5%), didorong oleh pertumbuhan lebih baik dalam pengeluaran Pembuatan lain (3.9%), Produk mineral bukan logam, logam asas & produk logam yang direka (8.1%) dan Makanan, minuman & tembakau (5.3%)."

Selain itu, nilai ditambah PMKS sektor Pertanian menunjukkan pertumbuhan lebih baik iaitu 2.5 peratus, berikutan pertumbuhan marginal 0.8 peratus pada tahun 2023. Prestasi ini disokong oleh subsektor Getah, kelapa sawit, ternakan & pertanian lain (2.6%) dan Perikanan (3.1%). Sektor Pembinaan meningkat ketara iaitu 17.3 peratus daripada 5.8 peratus pada tahun 2023. Sementara itu, sektor Perlombongan & pengkuarian meningkat 3.8 peratus (2023: 4.4%).

Eksport PMKS

Dato' Sri Dr. Mohd Uzir Mahidin menambah, "Eksport PMKS pada tahun 2024 berjumlah RM196.8 bilion, merekodkan pertumbuhan 31.3 peratus berbanding 3.0 peratus pada tahun 2023. Peningkatan ini disokong oleh sektor Perkhidmatan dan Pembuatan masing-masing meningkat sebanyak 114.8 peratus (2023: 16.4%) dan 7.9 peratus (2023: -0.7%). Eksport PMKS menyumbang 14.3 peratus daripada jumlah keseluruhan eksport pada tahun 2024, merangkumi sektor Pembuatan (8.8%), diikuti Perkhidmatan (5.2%) dan Pertanian (0.3%)."

Eksport PMKS bagi sektor Pembuatan meningkat kepada RM122.0 bilion pada tahun 2024 berbanding RM113.1 bilion pada tahun 2023. Pelbagai barang keluaran kilang, jentera & kelengkapan pengangkutan dan barang-barang keluaran kilang merupakan pemacu utama sektor ini, menyumbang 60.3 peratus pada tahun 2024. Singapura merupakan negara destinasi utama bagi eksport PMKS sektor Pembuatan dengan sumbangan 16.0 peratus, diikuti oleh China (13.6%) dan Amerika Syarikat (12.3%).

Pada masa yang sama, PMKS Malaysia dalam sektor Perkhidmatan telah menunjukkan prestasi eksport yang kukuh pada tahun 2024, dengan jumlah eksport melonjak daripada RM33.2 bilion pada tahun 2023 kepada RM71.3 bilion. Peningkatan ini sebahagian besarnya didorong oleh eksport Perjalanan, sejajar dengan pemulihan

kukuh ketibaan pelawat antarabangsa yang meningkat daripada 29.0 juta kepada 38.0 juta orang. Di samping Perjalanan, Perkhidmatan perniagaan lain serta Perkhidmatan telekomunikasi, komputer dan maklumat turut muncul sebagai komponen utama dalam eksport perkhidmatan PMKS sepanjang tahun tersebut.

Sektor pertanian mencatatkan eksport PMKS bernilai RM3.5 bilion pada tahun 2024 berbanding RM3.7 billion pada tahun sebelumnya, dengan penurunan 4.9 peratus. Kemerosotan ini disumbangkan oleh penurunan eksport buah-buahan seperti durian dan nanas serta ikan hiasan dan ayam/ itik, dengan nilai RM1.4 billion berbanding RM1.8 billion pada tahun 2023.

Guna Tenaga dan Produktiviti PMKS

Guna tenaga PMKS terus mencatatkan peningkatan dengan pertumbuhan tahunan yang lebih perlahan iaitu 3.1 peratus berbanding 3.5 peratus pada tahun 2023, untuk merekodkan sejumlah 8.10 juta orang (2023: 7.86 juta orang). Sehubungan itu, sumbangan guna tenaga PMKS kepada guna tenaga Malaysia pada tahun 2024 adalah 48.7 peratus, meningkat 0.2 mata peratus berbanding tahun sebelumnya (2023: 48.5%).

Mengikut aktiviti ekonomi, guna tenaga PMKS bagi sektor Pertanian menyumbang 42.3 peratus daripada keseluruhan guna tenaga dalam sektor ini, menunjukkan peningkatan marginal 0.6 peratus kepada 800 ribu orang pada tahun 2024. Bagi sektor Perlombongan & pengkuarian, guna tenaga PMKS menyumbang 28.0 peratus atau 21 ribu orang, mencatatkan pertumbuhan 1.8 peratus dalam tempoh tersebut. Pada masa yang sama, bilangan guna tenaga PMKS dalam sektor Pembuatan mencatatkan peningkatan 2.7 peratus kepada 1.31 juta orang, menyumbang sebanyak 46.2 peratus daripada jumlah guna tenaga dalam sektor ini pada tahun 2024.

Guna tenaga PMKS bagi sektor Pembinaan menyumbang 48.1 peratus daripada keseluruhan guna tenaga dalam sektor ini dengan jumlah 678 ribu orang, meningkat 0.4 peratus tahun ke tahun. Penyertaan guna tenaga PMKS dalam sektor Perkhidmatan terus meningkat sepanjang tahun, menyumbang 50.8 peratus daripada jumlah guna tenaga dalam sektor Perkhidmatan. Guna tenaga PMKS dalam sektor ini meningkat 4.0 peratus kepada 5.29 juta orang, sebahagian besarnya disumbangkan oleh subsektor Perdagangan borong & runcit, makanan & minuman dan penginapan.

Ketua Perangkawan mengulas lanjut berhubung prestasi produktiviti buruh PMKS bagi tahun 2024, "Produktiviti buruh PMKS yang diukur sebagai nilai ditambah per pekerja meningkat 2.6 peratus untuk mencatatkan nilai produktiviti sebanyak RM80,507 per pekerja (2023: RM78,475 per pekerja). Semua sektor menunjukkan peningkatan dalam produktiviti buruh, dengan pertumbuhan tertinggi produktiviti buruh

PMKS direkodkan oleh sektor Pembinaan (16.8%), diikuti Pembuatan (2.2%), Perlombongan & pengkuarian (2.0%), Pertanian (1.9%), dan Perkhidmatan (1.6%).”

Dalam keluaran statistik PMKS pada hari ini, semakan telah dibuat ke atas data KDNK dan Produktiviti PMKS bagi tahun 2022 dan 2023. Namun, bagi data Eksport PMKS, semakan hanya melibatkan tahun 2023. Semakan semula ini adalah berdasarkan laporan tahunan syarikat yang dikemaskini, Profil PMKS daripada Banci Ekonomi 2023 serta data sekunder daripada agensi yang berkaitan. Semakan semula ini adalah berpandukan kepada amalan statistik terbaik selaras dengan piawaian antarabangsa bagi memastikan kebolehpercayaan, kebolehbandingan dan ketepatan masa statistik tersebut.

Kepengerusian ASEAN-Malaysia 2025: Jabatan Perangkaan Malaysia (DOSM) akan mempengerusikan Jawatankuasa Sistem Statistik Komuniti ASEAN Ke-15 (ACSS15) yang bertujuan untuk memperkukuh kerjasama statistik ke arah pembangunan serantau yang mampan.

Malaysia buat julung kalinya telah menduduki tangga pertama (1) di peringkat global dalam laporan dwi-tahunan Open Data Inventory (ODIN) 2024/25 yang dikeluarkan oleh Open Data Watch (ODW), mengatasi 197 negara lain. Pencapaian ini merupakan lonjakan ketara daripada kedudukan ke-67 dalam penilaian ODIN 2022/23.

Kerajaan Malaysia telah mengisytiharkan 20 Oktober sebagai Hari Statistik Negara (MyStats Day), dengan tema 'Statistik Nadi Kehidupan.' Sementara itu, Hari Statistik Dunia Keempat akan disambut pada 20 Oktober 2025 dengan tema '*Driving Change with Quality Statistics and Data for Everyone*'.


OpenDOSM NextGen adalah medium yang menyediakan katalog data dan visualisasi bagi memudahkan pengguna menganalisis pelbagai data dan boleh diakses melalui portal <https://open.dosm.gov.my>.

Dikeluarkan oleh:

PEJABAT KETUA PERANGKAWAN MALAYSIA
JABATAN PERANGKAAN MALAYSIA
31 JULAI 2025


LAMPIRAN

Carta 1: KDNK Malaysia, PMKS dan Bukan PMKS pada Harga Malar, 2021-2024 – Perubahan Peratusan Tahunan




Nota: •Pertumbuhan KDNK PMKS berdasarkan Definisi Baharu KDNK PMKS bagi 2014 berbanding Definisi Lama KDNK PMKS bagi 2013
 •Pertumbuhan KDNK PMKS berdasarkan Definisi Baharu KDNK PMKS bagi 2014 berbanding Definisi Baharu KDNK PMKS bagi 2013
 •Pertumbuhan KDNK Bukan PMKS berdasarkan Definisi Baharu KDNK PMKS bagi 2014 berbanding Definisi Lama KDNK PMKS bagi 2013
 •Pertumbuhan KDNK Bukan PMKS berdasarkan Definisi Baharu KDNK PMKS bagi 2014 berbanding Definisi Baharu KDNK PMKS bagi 2013

Carta 2: Nilai Ditambah dan Sumbangan KDNK PMKS kepada KDNK Malaysia pada Harga Malar 2015, 2016-2024




LAMPIRAN

**Carta 3: Peratus Sumbangan dan Perubahan Peratusan Tahunan
Eksport PMKS mengikut Sektor, 2016-2024**




Carta 4: Bilangan dan Perubahan Peratusan Tahunan Guna Tenaga, 2017-2024



LAMPIRAN

Carta 5: Bilangan Pertubuhan PMKS mengikut Negeri, 2024



Carta 6: Peratus Sumbangan Bilangan Pertubuhan PMKS mengikut Sektor, 2024

